



*Senen, 18 Juli 2022*  
**Ogen: Pengerana 3:1-11**



**Kai Pe Erpaksa-paksa**



**T**ep-tep jaman lit mode si icidahken. Mode bas peruis, mode bas pangan, mode cara erkomunikasi ras sidebanna. Mbarena melala kel pake surat, dung e telepon rumah, seterusnya telepon gemgam si banci ngerana tapila siidahen (HP) janah genduari banci kita make sada alat tapi erbage dahin banci ilakoken bas ingan e kerina. HP androit, genduari ipaken guna ertelepon, erbahan surat, erbahan dahin ngetiken tugas-tugas kantor ras sekolah, erpoto ras ncidahken ku doni kerna ija genduari kita tading. Alu kata sideban arah Androit enda banci lanai kita ku kantor pos, lanai maba kamera, lanai maba kalkulator, lanai maba TV, radio ras sidebanna. Bas aplikasi andoit e enggo isikapken kerina. Bage ka kin jaman sigenduari e. Kerina serba cepat, simple (mesunah) ras sidebanna.

"Orang yang tidak mengikuti jaman akan tergilas oleh jaman itu" kata enda ngajuk kita ngasup ngikuti kerina paksa-paksa si lit alu payo. Selaku kalak sierkiniteken kitab Pengerana pe ngatakan maka kerina erpaksa-paksa. Lit paksa tubuh, lit paksa ngambur benih, lit paksa ceda ate, lit paksa kebenen ras sidebanna. Kerina kita ngeluh bas paksa-paksa enda, janah niarapken kita banci ndalanisa alu tetap bas terang kata Dibata. Tugasta uga kita ngasup nerangi kerina paksa e segelah la paksa-paksa e mabai kita ndauh sirang ras Tuhan tapi bahan lah paksa-paksa e mperdeher kita ras Tuhan. Sipindo gegeh man Tuhan segelah ibrena kepantaren man banta bas makeken paksa-paksa enda.

Adi paksana genduari kita geluh bas doni sidem tekhnologi mari pakeken alu payo, janah kai si la sendalanen ras jaman enda sitadingkenlah. Sebab kita tading bas doni enda, janah kalak sibanci nerangi doni enda e me kalak singeluh bas doni si meteh kai si gelap janah banci sigelap e iterangina. Pakeken kinitekenta guna nerangi jaman sigenduari enda.